

## **Būtom gerā**

Užkēba mon žovelē stebuklinga  
Ēr saka mon: „Kuo nuori, liorbi to?  
A nuori, ka padarītiuo tavi laiminga?  
A tikta nuori piningū?“  
Sakau, mon nerēk daug,  
Bet bēški rēktom –  
Tas mona truobas patvarkītē,  
Paskiau, nuorētiuo „Žēgolioka“ i  
„Mersedesa“ pamainītē.  
Norētiuo da keliautē pu svieta  
Ē niekam nieka nemuokietē,  
I Niagara paveizēte  
Ēr Afrika pasēgierietē,  
Kad vēsē aplink muni šuokinieto,  
Kāp rekalaun tas etikets,  
Netīčiuom ožēte i Baltūsus rūmus  
Ēr so Uobama pasērokoutē  
Aple pasaulē atšēlēma, madas,  
Gierēmus ēr mergas...  
Kažkas, kad vuoš mon palei skrondi:  
– Neknark, – ēšgērsto aš.  
Pradinga mona sapnū žovēs,  
Tik galvuo lēka ratilā.  
Dabā gailous, ka nesospiejau pasakītē,  
Kad ēr piningās mon būtom gerā!